

四庫全書

史部

欽定四庫全書

元史紀事本末卷四

明 陳邦瞻 撰

托克托之

乞略錫爾附

順帝至元六年二月黜中書大丞相巴延為河南行省  
左丞相巴延既誅騰吉斯獨秉國鈞遂專權自恣變亂  
成憲虐害天下漸有異謀帝患之巴延欲以所養弟之  
子托克托宿衛傾帝起居懼涉物議乃以知樞要汪嘉

努翰林學士承旨實喇卜同侍禁近實屬意托克托托  
克托政令日修衛士拱聽約束巴延自領諸衛精兵以  
揚珠布哈為屏蔽導從之盛填溢街衢而帝儀衛反落  
落如晨星勢焰薰灼天下之人知有巴延而已托克托  
深憂之私請於父瑪札爾台曰伯父驕縱已甚萬一天子  
震怒則吾族赤矣曷若於未敗圖之其父亦以為然托  
克托復質於師吳直方直方曰大義滅親大夫但知忠  
於國耳餘復何顧焉一日見帝乘間自陳忘家徇國之意

帝猶未之信時帝前後左右皆巴延之黨獨沙克嘉巴  
勒阿魯為帝腹心乃遣二人與托克托遊日以忠義之  
言相與往復論辨益悉其心靡他遂聞於帝帝始信之  
無疑及巴延構陷剌王徹辰圖奏賜死帝未允輒殺之  
又擅貶宣讓威順二王帝不勝其怒決意逐之一日泣語托  
克托克托亦泣下歸復與直方謀直方曰此大事議論  
之際左右為誰曰阿魯及托克托穆爾直方曰子之伯  
父挾震主之威此輩苟利富貴其語一洩則主危身戮矣

托克托乃延二人於家置酒張樂晝夜不令出遂與沙克嘉巴勒等謀欲候巴延入朝擒之戒衛士嚴宮門出入螭坳皆為置兵巴延見之大驚召托克托責之對曰天子所居防禦不得不爾然遂疑托克托亦增兵自衛至是巴延以所領衛兵請帝出田托克托勸帝稱疾不往巴延固請乃命太子雅克托郭斯出次柳林托克托遂與阿魯等合謀悉拘京城門鑰命所親信列布城門下是夜奉帝居玉德殿召省院大臣先後入見出午門

聽命夜二鼓遣集賽伊克察喇率三十騎抵營中取太子入城又召楊瑀范匯入草詔數巴延罪狀出為河南行省左丞相命平章事珠爾噶岱賫赴柳林黎明巴延遣騎士至城下問故托克托倨城上宣言有旨黜丞相一人諸從官皆無罪可各還本衛巴延奏乞陞辭不許道出真定父老奉觴酒以進巴延曰爾曾見有子殺父事乎對曰不曾見子殺父惟聞有臣弑君巴延俛首有慚色以瑪札爾台為太師右丞相托克托知樞密院詔托

克托之外諸侯王不得懸帶弓箭及環刀輒入內府十月瑪札爾台辭右丞相仍為太師以托克托為中書右丞相托克托既秉政悉更巴延所行復科舉取士行太廟四時祭雪剌王之寃召還宣讓威順二王禁減鹽額蠲負逋閒經筵中外翕然稱賢相焉

至正三年十二月以伯勒齊爾布哈為左丞相

四年五月托克托罷以阿魯圖為中書右丞相托克托固辭相位帝問誰可代者以阿魯圖對遂召用之封托

克托為鄭王

七年六月詔免太師瑪札爾台官安置於西寧時阿魯圖罷伯勒齊爾布哈為右丞相以宿憾譖瑪札爾台故有是詔托克托力請與父俱行時相欲傾之因有告變者復移於西域察蘇之地御史大夫額琳沁巴勒曰托克托父子無大過奈何迫之於險遂召還甘肅瑪札爾尋卒

九年七月復以托克托為中書右丞相初瑪札爾台卒



左丞相太平請令托克托歸葬左右以為難太平固請托克托得還及拜太傅托克托不知太平之有德於已也因汝中栢讒間成隙欲中傷之是時中書叅政孔思立等皆一時名人太平所拔用者悉誣以罪黜去太平既罷又誣劾之托克托母聞之謂托克托兄弟曰太平何害於汝而欲去之汝兄弟若違吾言非吾子也遂止太平故吏田復勸之自裁太平曰吾無罪當聽於天若自殺則誠有歟矣遂還奉元杜門不出

十二年八月托克托自請出師伐徐州賊李二詔許之  
兵部尚書穆爾瑪哈穆特等言大臣天子之股肱中書  
庶政之根本不可一日離乞留托克托以弼亮天工庶  
內外有兼治之宜不報遂詔托克托以達爾罕太傅右  
丞相分省於外總制諸路軍馬凡爵賞誅殺悉聽便宜  
從事托克托尋破賊於徐州即軍中加拜太師趣還朝  
先是托克托弟額森特穆爾出師討劉福通駐沙河軍  
夜潰西臺御史范文劉希曾等劾其喪師辱國托克托

庇之詔不問中臺御史周伯琦阿附托克托劾文等越  
分干譽乃左遷西臺御史大夫多爾濟巴勒為湖廣平  
章而盡出文等由是不敢言事汝中栢等復言於托  
克托曰不殺多爾濟巴勒丞相終不安乃命給軍餉總  
兵者希指數侵辱之不為動托克托復遣助教旺扎勒  
至軍中諷使害之旺扎勒至謂人曰平章國家耆勲舊  
德吾苟害之人將不食吾餘矣多爾濟巴勒竟卒於黃

州

十三年正月以哈瑪爾為中書平章政事先是托克托西行也伯勒齊爾布哈為相以宿怨每欲中傷之賴哈瑪爾在上前營護得免伯勒齊爾布哈又與太平韓嘉納克圖們岱爾等十人結為兄弟及托克托復相謫太平陝西出伯勒齊爾布哈般陽圖們岱爾四川右丞誣以罪追至中途殺之而深德哈瑪爾復召用至是拜平章

十四年九月托克托總制諸軍出討高郵賊張士誠尋

破賊于高郵城外 十二月詔削托克托官爵安置淮安  
以台哈布哈等代總其軍初托克托之再相信用汝中栢  
由左司郎中叅議中書省平章以下見其議事莫敢異  
同惟哈瑪爾以有德於托克托不為之下汝中栢因譖  
之托克托改為宣政院使哈瑪爾深銜之至是嗾御史  
袁賽音布哈等劾托克托出師三月略無寸功傾國家  
之財以為已用半朝廷之官以為已隨其弟御史大夫  
額森特穆爾庸材鄙器玷污清臺紀綱之政不修貪淫

之心益著章三上詔以托克托老師費財已逾三月坐  
視寇盜恬不為意削去官爵淮安安置額森特穆爾安  
置寧夏以台哈布哈伊克察喇蘇蘇代將其兵詔至軍  
中龔伯遂曰將在軍君命有所不受且丞相出師時嘗  
受密旨一意進討可也詔書且勿聞開則大事去矣托  
克托曰天子詔我而我不從是我與天子抗也君臣之  
義何在既受詔即出名甲名馬分賜諸將俾各帥所部  
以聽伊克察喇等節制客省副使哈喇岱曰丞相此行

我輩必死他人之手今日寧死丞相前遂拔刀自刎而死

十五年三月竄托克托於雲南初安置托克托於淮安既又移置額齊訥路至是臺臣尤論其謫輕故再徙雲南之鎮西其弟額森特穆爾徙四川碭門長子哈喇章肅州次子三寶努蘭州仍籍其家產十二月哈瑪爾矯詔殺托克托於雲南托克托既貶雲南行次大理騰衝知府高惠欲以女事之托克托曰吾罪人也安敢念及

此巽詞拒絕惠銜之至是再徙阿恰齊之地惠發軍圍之哈瑪爾又矯詔遣使賜之鵠遂卒年四十二史臣曰托克托始終不失臣節惟惑於羣小急復私怨君子病焉哈瑪爾者喀喇人與其弟蘇蘇備宿衛帝深寵眷之而哈瑪爾有口才尤為帝所嬖幸累遷官殿中侍御史帝每即內殿與哈瑪爾以雙陸為戲一日哈瑪爾服新衣侍側帝方啜茶即嚙茶於其衣哈瑪爾視帝曰天子固當如是耶帝一笑而已其被愛幸無與為比太平



為左丞相深惡之與御史大夫韓嘉納克謀出哈瑪爾諷  
監察御史沃噶海壽列其惡劾奏之其小罪則受宣讓王  
等駝馬諸物其大者則設帳御幄後無君臣禮又恃以  
提調徽寧寺為名出入托果斯皇后宮闈無間犯分之  
罪尤大徽寧寺者主托果斯皇后錢糧而托果斯皇后  
帝庶母也章再上帝僅奪哈瑪爾蘇蘇官爵居之草地  
而太平等三人俱罷項之復以托果斯皇后言奪海壽  
官禁錮之謫太平居陝西加韓嘉納克賊罪杖流尼嚕

罕以死哈瑪爾復用初哈瑪爾嘗進西天僧以運氣術  
媚帝帝習為之號延徹爾法延徹爾華言大喜樂也哈  
瑪爾之妹婿集賢學士圖魯特穆爾故有寵於帝與婁  
達實巴朗達爾瑪濟達巴勒幹爾密等俱號伊納克圖  
魯特穆爾性姦狡帝愛之亦薦西番僧且琳沁於帝且  
琳沁善秘密法謂帝曰陛下雖尊居萬乘富有四海不  
過保有見世而已人生幾何當受此秘密大喜樂禪定  
帝又習之其法亦名雙修曰延徹爾曰秘密皆房中術

也帝乃詔以西天僧為司徒西番僧為太元國師其徒皆取良家女或四人或三人奉之謂之供養於是帝日從事於其法廣取婦女惟淫戲是樂又選采女為十六天魔舞每宮中讚佛則按舞奏樂宮官受秘密戒者得入餘不與又為龍舟自後宮至前宮山下海子內遊戲八郎者帝諸弟與其所謂伊納克者皆在帝前相與褻狎甚至男女裸處號所出室曰色濟克烏格依華言事無礙也君臣宣淫而羣僧出入禁中無所禁止醜聲著

聞雖市井之人亦惡聞之皇太子年日長尤深疾圖嚕  
特穆爾等所為然欲去之未能也哈瑪爾既諧殺托克  
托遂拜中書左丞相蘇蘇亦由知樞密院拜御史大夫  
由是國家大柄盡歸其兄弟二人矣哈瑪爾既相自以  
前所進番僧為恥告其父圖嚕曰我兄弟位居宰輔宜  
導人主以正今圖嚕特穆爾專媚上以淫褻天下士大  
夫必譏笑我我將除之且上日趨昏暗皇太子年長聰  
明過人不若立以為帝而奉上為太上皇其妹聞之歸

告其夫圖魯特穆爾恐皇太子為帝則已必誅即以聞  
于帝然不敢斥言淫褻事第曰哈瑪爾謂陛下年老故  
耳帝大驚曰朕頭未白齒未落遽謂我為老耶帝即與  
圖魯特穆爾謀去哈瑪爾蘇蘇計已定圖魯特穆爾走  
匿尼寺中明日帝遣使傳旨哈瑪爾蘇蘇毋入朝御史  
大夫吹斯絅因奏劾其罪帝猶不忍右丞相鼎珠等論  
奏不已始詔哈瑪爾惠州安置蘇蘇肇州安置臨行俱  
杖死仍籍其家

小明王之立

順帝至正十一年五月潁州妖人劉福通蕭縣李二兵起先是四方羣盜蜂起有司不能制及發丁夫開河民心益愁怨思亂有韓山童者樂城人自其祖父以白蓮會燒香惑衆謫徙永平至山童倡言天下大亂彌勒佛下生河南及江淮愚民翕然信之福通與杜遵道羅文素盛文郁王顯忠韓咬兒復鼓妖言言山童實宋徽宗八世孫當為中國主福通等乃刑白馬黑牛誓告天地遂

同起兵以紅巾為號縣官捕之急山童就擒其妻楊氏及其子韓林兒逃之武安惟福通黨盛不可制朝廷乃命同知樞密院圖沁以兵擊之福通既破潁州遂據朱臯攻羅山上蔡真陽確山諸縣尋犯武陽葉縣陷汝寧府及光息二州衆至十萬李二號芝麻李亦以燒香聚衆與其黨趙均用彭早住攻陷徐州據之九月劉福通兵勢日盛右丞相托克托乃奏以其弟御史大夫額森特穆爾知樞密院事及衛王庫齊格爾總帥諸衛軍十

餘萬討之復上蔡擒其黨韓咬兒誅之

十二年二月定遠郭子興見汝潁兵起列郡騷動遂與其黨  
孫德崖等舉兵自稱元帥攻拔濠州據之徹爾布哈率兵  
欲復濠城憚不敢進惟日掠良民指稱為盜以邀賞由是  
人皆洶洶不安訛言日甚三月額森特穆爾軍潰於沙

河時額森特穆爾駐軍沙河軍中夜驚盡棄軍械北奔汴  
梁收散卒退屯朱仙鎮朝廷以額森特穆爾不知兵遣平  
章曼濟代之九月右丞相托克托自出軍至徐州攻其



西門賊出戰奮擊破之芝麻李遁去趙均用彭早住走濠州追擒其將數十人遂屠其城尋召托克托還朝

十五年二月劉福通自碭山夾河迎韓林兒至立為皇帝又號小明王建都亳州國號宋改元龍鳳以其母楊氏為皇太后杜遵道盛文郁為丞相劉福通羅文素為平章劉六知樞密院事拆太清宮材建宮闕福通疾遵道專權命甲士撾殺之遂自為丞相十一月達實巴圖爾進擊劉福通戰於長葛大敗將士皆奔潰至中牟收

散卒屯聚會劉哈喇引兵來援大破福通兵復駐汴梁  
十二月達實巴圖爾大破劉福通於太康遂圍亳州小  
明王遁安豐

十七年二月劉福通遣其黨毛貴陷膠州倪文俊陷陝  
州李武崔德等破商州攻武關直趨長安分掠同華諸  
州三輔震恐俄為察罕特穆爾所敗乃退六月劉福通  
攻汴梁其兵分三道關先生破頭潘馮長舅沙劉二趨  
晉冀白不信大刀教李喜喜趨關中毛貴據山東其勢

大振 十二月太尉達實巴圖爾卒于軍時劉福通攻陷曹濮大名衛輝諸路達實巴圖爾引兵擊之詔遣知樞密院事達爾瑪實哩來援分兵于雷澤濮州以禦福通達爾瑪實哩戰沒諸軍大潰達實巴圖爾退駐石村朝廷疑其玩寇失機使者趣戰相踵敵覘知之詐為達實巴圖爾通好書遺諸路使者果得之以進達實巴圖爾聞之憂憤死

十八年五月劉福通攻汴梁守將珠展出走福通入據

其城乃自安豐迎其主韓林兒居之以為都 秋七月  
懷慶路守將周全叛附于劉福通時察罕特穆爾駐軍  
洛陽遣拜特穆爾以兵守盩厔城周全來戰拜特穆爾  
為其所殺遂盡驅懷慶民入汴梁福通遣全攻洛陽守  
將登城以大義責全全愧謝退兵福通殺之

十九年八月察罕特穆爾克汴梁劉福通復以其主韓  
林兒走據安豐

二十三年二月張士誠將呂珍入安豐殺劉福通據其

城

二十六年十二月小明王韓林兒卒

察罕特穆爾克復之功

順帝至正十二年十二月以察罕特穆爾為汝寧府達  
魯噶齊先是汝潁盜起江淮諸郡皆殘破朝廷徵兵致  
討卒無成功潁州沈邱人察罕特穆爾奮起義兵沈邱  
子弟願從者數百人與羅山李思齊同設奇計襲破羅  
山事聞朝廷授察罕特穆爾汝寧府達魯噶齊思齊知

府事於是所在義士俱將兵來會得萬人自成一軍屯  
沈邱數與賊戰輒克捷

十五年汝潁賊勢滋盛由汴以南陷鄧許嵩洛等州察  
罕特穆爾引其兵轉戰而北遂戍虎牢以遏鋒賊乃北  
渡孟津焚掠至覃懷河北震動察罕特穆爾進戰大敗  
之餘黨立柵河洲殲之無遺類河北遂定朝廷奇其功  
除中書刑部侍郎苗軍以滎陽叛察罕特穆爾夜襲之  
虜其衆遂營中牟已而淮右賊衆三十萬掠汴以西來

擣中牟營寨罕特穆爾結陣待之以死生利害諭士卒  
士卒賈勇決死戰無不以一當百會大風揚沙自率猛  
士鼓譟從中起奮擊賊中堅賊勢披靡不能支棄旗鼓  
遁走追殺十餘里斬首無算軍勢大振

十六年汝潁賊李武崔德等陷陝州遂斷穀函勢欲趨  
秦晉知樞密院事達實巴圖爾方節制河南軍調察罕  
特穆爾及李思齊往攻之察罕特穆爾即鼓行而西夜  
拔穀陵立柵交口陝城堅賊轉南山粟給食固守攻之

猝不可拔察罕特穆爾乃焚馬矢營中如炊煙狀以疑賊而夜提兵拔靈寶城賊始覺不敢動渡河掠安邑察罕特穆爾追襲以鐵騎蹙之賊回扼下陽赴水死者甚衆賊勢窮遁去以功加河北行樞密院事

十七年劉福通遣其黨毛貴陷膠州倪文俊陷陝州李武等破商州攻武關遂直趨長安掠同華諸州三輔震恐其時行臺豫王喇特納錫哩及省院官皆洵懼計無所出侍御史王思誠曰察罕特穆爾之名賊素畏之宜



遣使求援此上策也守將恐其軋已論久不決思誠曰  
吾兵弱朝夕失守咎將安歸乃移書察罕特穆爾曰河  
南陝西二省互為唇齒陝西危則河南豈能獨安察罕  
特穆爾新復陝州得書大喜遂提輕兵五千與李思齊  
倍道赴援遇賊轉戰殺掠無算賊遂潰捷聞朝廷以察  
罕特穆爾為陝西行省左丞未幾賊自巴蜀陷秦隴據  
鞏昌遂窺鳳翔察罕特穆爾即先分兵入守鳳翔城而  
遣諜者誘賊圍鳳翔察罕特穆爾自將鐵騎晝夜馳二

百里赴之分軍張左右翼掩擊城中軍亦開門鼓譟而出內外合擊呼聲動天地賊大亂自相踐蹂斬首數萬級餘黨皆遁關中遂定

十八年賊毛貴等陷山東遂分道犯京畿朝廷徵諸道兵入衛詔察罕特穆爾以兵屯涿州察罕特穆爾即留兵戍清湫義谷屯潼關塞南山口以備他盜而自將銳卒赴召時曹濮賊方分道踰太行焚上黨掠晉冀陷雲中鴈門上郡烽火數千里復大掠南還察罕特穆爾先

遣兵伏南山阻隘自勒重兵屯聞喜絳陽賊果出南山縱伏兵橫擊之賊皆棄輜重走山谷遂分兵屯澤州塞碗子城屯上黨塞吾兒谷屯并州塞井陘口以杜太行諸道賊屢至守將數血戰擊却之河東遂定進陝西行省右丞兼行臺侍御史同知河南行樞密院事於是朝廷乃詔察罕特穆爾守禦關陝晉冀撫鎮漢沔荆襄便宜行事察罕特穆爾益務練兵訓農以平定四方為已責是年劉福通陷汴梁造宮闕易正朔號召羣盜自巴

蜀荆楚江淮齊魯遼西至甘肅所在兵起勢相聯結  
察罕特穆爾乃北塞太行南守鞏洛自將中軍軍汚池  
將謀取汴會叛將周全以賊軍攻洛陽察罕特穆爾以  
奇兵出宜陽破之進陝西行臺平章政事仍兼同知行  
樞密院事

十九年察罕特穆爾以大軍次虎牢先發游騎南道出  
汴南略歸亳陳蔡北道出汴東戰船浮于梁水陸並下  
略曹南據黃陵渡乃大發秦兵出孟谷過虎牢晉兵出

太行踰黃河俱會汴城下首奪其外城察罕特穆爾自將鐵騎屯杏花營諸將環城而壘賊屢出戰輒敗遂嬰城以守乃夜伏兵城南旦日遣苗軍跳梁者略城而東賊傾城出追伏兵鼓譟起邀擊敗之又令弱卒立柵外城以餌賊賊出爭之佯走薄城西因縱鐵騎突擊悉擒其衆賊由是不敢復出自五月至八月謀知城中計窮食且盡乃與諸將閻思孝等議各分門而攻至夜將士賈勇登城斬闕入遂拔之劉福通挾其僞主從數百騎

出東門遁去捷聞進河南平章政事兼樞密陝西行臺御史中丞詔告天下先是中原亂江南海漕不復通京師屢告饑至是河南既定檄書達江浙海漕乃復至

二十一年察罕特穆爾克山東先是察罕特穆爾既定河南乃以兵分鎮關陝荆襄河洛江淮而重兵屯太行營壘旌旗相望數千里乃日修車船繕兵甲務農積穀訓練士卒謀大舉以復山東至是諜知山東羣盜自相攻殺而濟寧田豐亦降于賊六月察罕特穆爾乃興疾

自陝抵洛大會諸將與議師期發并州軍出井陘遼沁  
軍出邯鄲澤潞軍出磁州懷衛軍出白馬及汴洛軍水  
陸俱下分道並進而自率鐵騎建大將旗鼓渡孟津踰  
覃懷鼓行而東復寇州東昌八月師至鹽河遣其子庫  
庫特穆爾及諸將以精兵五萬擣東平與東平賊遇兩  
戰皆敗之斬首萬餘級直抵其城下察罕特穆爾以田  
豐據山東久軍民服之乃遣書諭以順逆之理豐及王  
士誠皆降遂克東平濟寧時大軍猶未渡羣賊皆聚于

濟南而出兵齊河禹城拒戰察罕特穆爾分遣奇兵取  
間道出賊後南略泰安逼益都北徇濟陽章邱中循濱  
海郡邑乃自率大軍渡河與賊將戰于分齊大敗之進  
逼濟南城而齊河禹城俱來降南道諸將亦報捷再敗  
益都兵于好石橋東至海濱郡邑皆聞風送款攻圍濟  
南三月城乃下詔拜中書平章政事知河南山東行樞  
密院事陝西行臺中丞如故察罕特穆爾遂進兵圍益  
都環城列營凡數十大治攻具百道並進賊悉力拒守



復掘重塹築長圍遏南洋河以灌城中仍分守要害收輯流亡郡縣戶口再歸職方號令煥然

二十一年察罕特穆爾為田豐所殺時山東俱平獨益都孤城猶未下六月田豐王士誠陰結賊復圖叛豐之降也察罕特穆爾推誠待之不疑數獨入其帳中豐既謀變乃請察罕特穆爾行觀營壘衆以為不可往察罕特穆爾曰吾推心待人安得人人而防之左右請以力士從又不許乃從輕騎十有一人行至王信營又至豐

營遂為王士誠所刺先是有白氣如索長五百餘丈起  
危宿掃太微垣太史奏山東當大水帝曰不然山東必  
失一良將即馳詔戒察罕特穆爾勿輕舉未至而已及  
於難詔贈潁川王諡忠襄命其子庫庫特穆爾為平章  
政事兼知山東河南行樞密院事代總其兵庫庫特穆  
爾既襲父職身率將士誓必復讐而賊城守益堅乃遣  
壯士穴地通道以入十一月遂拔其城執賊首陳孫頭  
等二百餘人取田豐王士誠之心以祭其父餘黨皆就

誅復遣兵取莒州山東悉平

東南喪亂

順帝至正八年十一月台州黃巖民方國珍兵起初國珍與蔡亂頭等相讐殺遂入海為亂劫掠漕運詔江浙叅政多爾濟巴勒討捕之追至福州國珍知事危焚舟將遁我兵自相驚潰多爾濟巴勒遂被執國珍迫其上招降之狀朝廷從之授國珍兄弟以官將治多爾濟巴勒之罪樞密叅議歸暘曰將之失利其罪固當然所部

皆北方步騎不習水戰是驅之死地耳宜募海濱之民習水利者擒之今國珍遣人請降決不當從國珍已敗我王師又拘我王臣力屈而來非真降也必討之以令四方時朝廷方事姑息卒從其請國珍兄弟不肯赴勢益猖獗十一年六月方國珍兄弟入海燒掠沿海州郡朝廷遣江浙行省左丞博囉特穆爾往擊之兵至大閘洋國珍夜率勁卒縱火鼓譟官軍不戰皆潰赴水死者過半博囉特穆爾被執反為國珍飾詞上聞朝廷復遣達實特

穆爾等至黃巖招國珍國珍兄弟皆登岸羅拜退止民間紹興總管台哈布哈欲命壯士襲殺之達實特穆爾曰我受詔招降公等欲擅命耶乃止仍檄台哈布哈至海濱散其徒衆授國珍兄弟官有差十月蘄州人徐壽輝等兵起攻陷蘄水縣及黃州路壽輝自稱皇帝國號天完改元治平以鄒普勝為太師攻陷饒州執魏中立陷信州執于大本二人不屈並死之

十二年正月徐壽輝兵陷漢陽遂陷武昌行省丞相威

順王科綽布哈等棄城走壽輝兵復陷安陸府知府綽  
羅戰不勝死之攻沔陽推官俞述祖戰敗被執不屈壽  
輝怒支解之 二月徐壽輝兵攻九江石丞博囉特穆  
爾方駐兵于江間風宵遁總管李黼檄鄉落聚木石于  
險處遏其歸路黃梅主簿伊遜特穆爾願出擊賊黼與  
之出戰大敗賊兵殺獲二萬餘人黼曰賊不利於陸必  
以舟薄我乃令以長木數千冒鐵椎于杪暗植沿岸水中  
賊舟數千艘順流鼓譟而至遇木樁不得動黼發火箭

射之焚溺無算時東際淮南西自荆湖守臣往往棄城  
遁獨黼守孤城中外援絕而賊勢益熾進兵薄城分省  
平章托卜堅布哈自北門出走黼引兵登埤賊已焚西  
門張弩射之轉攻東門黼急往救城已破賊兵入矣猶  
與之巷戰力不能敵乃揮劍叱之曰殺我無殺百姓賊  
刺之墮馬與兄冕子秉昭俱死州民聞之哭聲震地具  
棺塋之時冕居穎亦死于賊事聞贈黼隴西公謚文  
忠 三月台州路達嚕噶齊台哈布哈與方國珍戰于

澄江死之時朝廷方征徐州命江浙募舟師北守大江國珍  
懷疑復劫其黨入海台哈布哈遣義士王大用往諭國珍拘留  
不遣而令其黨陳仲達往來議降台哈布哈具舟張受降旗  
乘潮下澄江觸沙不行垂與國珍遇呼仲達申前議仲達  
目動氣索台哈布哈覺其心異手斬之即前搏賊船奮擊  
之賊羣至欲抱持入其船台哈布哈嗔目叱之奪刀殺賊賊  
攢槳刺之中頸死猶植立不仆投其屍海中事聞追贈魏  
國公謚忠介 七月徐壽輝遣項普略引兵掠徽饒諸



州遂犯昱嶺關攻杭州城城中猝無備參政樊執敬遽上馬率衆出中途與賊遇乃奮力斫賊中鎗而死時董搏霄從江浙平章嘉琿征安豐乘勝攻濠州會朝廷命移軍援江南遂渡江至德清而杭州已陷嘉琿問計搏霄曰賊見杭城子女玉帛必縱欲不暇為備宜急攻之若退保湖州使賊乘銳出京口則江南不可為矣嘉琿猶豫未決諸將亦難其行搏霄曰公江浙相君方面既臨而及今不取誰任其咎復拔劍顧諸將曰相君在此敢有慢令者斬遂進兵薄

杭州賊迎敵麾壯士突前諸軍相繼夾擊凡七戰追殺至清河坊賊奔接待寺塞其門而焚之賊皆死遂復杭州已而餘杭武康德清亦次第平搏霄亦受代去徽饒賊復自昱嶺闖寇於潛行省乃假搏霄為叅政復提兵討之搏霄即日引兵扼新溪追殺至於潛復其縣又復昱嶺闖賊兵復大至陷千秋關搏霄按軍不動伏兵城下授以火礮約曰見旗動即發已而視賊稍懈進兵擊之伏兵見旗動盡發遂奪千秋關賊復攻獨松百丈幽

嶺三關搏霄先以兵守要路分三道會兵擣賊巢乘勝復安吉尋克廣德賊復犯徽州有道士能作十二里霧搏霄伏兵擊之已而妖霧開伏兵皆起賊大潰斬首數萬級徽州復平 九月以余闕為淮西宣慰副使守安

慶時寇兵日盛闕抵官十日而賊至拒却之乃集有司諸將議屯田戰守策環境築堡砦選精甲外捍而耕稼於中浚湟增陴隍外環以大防深塹三重南引江水注之環植木為柵城上四面起飛樓表裏完固俄升都元

帥廣西苗軍五萬從元帥阿爾斯蘭沿江下抵廬州闕  
移文謂苗蠻不當使窺中國詔阿爾斯蘭引還苗兵有  
暴于境者即收戮之凜凜莫敢犯時羣盜環布四外闕  
居其中左提右挈屹為江淮一保障十一月江西行  
省平章政事桑節擊趙普勝戰于湖口兵敗死之桑節  
初為南臺御史大夫執政惡之出為湖廣平章至是移  
江西桑節馳赴任比至江東復有詔令守江州時江州  
已陷趙普勝周驢等據池陽太平諸郡號百萬桑節募

兵得三千人趨銅陵克之擒驢奪其船六百艘軍聲大振遂復池州分兵攻石埭諸縣進據清水灣又大破之賊久圍安慶間風燒營遁去遂進復湖口縣克江州留兵守之命王惟恭樹柵小孤山桑節自據番陽口綴江西要衝以圖恢復日久援不至賊乘大艦來攻編葦筏塞上下流火之桑節率兵力戰衆死且盡桑節獨堅坐不動中流矢而仆賊素聞其名不忍害昇至密室乃蘇羅拜餽食桑節叱之七日乃自力而起北向再拜曰臣

力竭矣遂絕桑節河西人楚斯結之子

十三年五月泰州白駒場亭民張士誠及其弟士德士信起兵陷泰州淮南行省遣知府李齊招降被留久之賊酋自相戕始縱齊來歸士誠尋殺叅政趙璉陷興化縣行省以左丞僉哲篤鎮高郵出齊守臂社湖會數賊呼譟入城省憲官皆遁齊還城門已閉士誠遂據高郵稱誠王國號大周建元天祐己而有詔赦之使至不得入賊紿言請李知府來乃受命行省強齊往至則下齊

于獄齊雖辨說百端而士誠本無降意士誠呼齊使跪  
齊叱曰吾膝如鐵豈為賊屈士誠怒使拽倒椎碎其膝  
而曷之時論大科三魁若李黼台哈布哈及齊皆不負  
科名云 十月以方國珍兄弟為各路治中不受先是  
遣江浙左丞托里特穆爾及南臺侍御史尊達實哩復  
招諭國珍既而二人報國珍已降乞授以五品流官令  
納其船散遣徒衆遂以國珍為徽州路治中國章廣德  
路治中國英信州路治中國珍等疑懼不受命仍擁船

千艘據海道阻絕糧運復遣江浙右丞阿哩袞實克等率兵討之十二月江浙行省布延特穆爾及西寧王雅克哈尚等合軍討徐壽輝于蘄水壽輝敗走獲其官屬四百人初徐壽輝將王善既陷羅源遂攻福州連江縣巡檢劉濬募壯士與其子健數與力戰濬中箭墜馬健下馬掖之俱被執濬罵賊而死健亦以死拒賊善義而釋之使瘞父屍健歸請帥府兵以復讐言弗聽因盡散家貲結死士百人詐為工商流丐入賊中半夜發火大



謀賊驚擾自相殺健手斬殺其父者并擒善獻于帥府  
事間贈濬行省檢校授健古田令

十四年六月張士誠寇楊州達實特穆爾兵敗諸軍皆  
潰士誠尋陷盱眙及泗州

十五年春正月徐壽輝遣其將倪文俊復破沔陽威順  
王科綽布哈令其子報恩努等同元帥阿爾斯蘭水陸  
並進討之至漢川水淺文俊用火筏燒船兵遂敗報恩  
努被殺 三月徐壽輝兵破襄陽 五月倪文俊自沔

陽復破中興路元帥多爾濟巴勒戰死

十六年正月倪文俊建都于漢陽迎徐壽輝據之未幾復陷常德澧州諸路二月張士誠陷平江路據之改為隆平府遂陷湖州松江常州諸路初或傳士誠有降意朝廷遣烏瑪喇孫攜持詔往諭之士誠拘之一室迫使降攜詔斥不絕及士誠徙平江攜與士誠部將張茂先者謀遣人約鎮南王刻日進兵復高郵事洩被害三月方國珍復降命為海道漕運萬戶其兄國璋為衢

州路總管 七月張士誠遣兵破杭州江浙丞相達實特穆爾遁平章尊達實哩力戰死先是達實特穆爾兵屢敗議者以為苗軍可用遂自寶慶招土官楊旺扎勒至淮南殺賊以功屢官江浙行省叅政至是士誠兵破杭州達實特穆爾兵入富陽旺扎勒乃自嘉興引苗軍及萬戶普賢努擊敗士誠兵復其城達實特穆爾乃還然苗軍素無紀律肆為鈔掠所過蕩然無遺達實特穆爾方倚旺扎勒為重莫敢禁遏旺扎勒益恣凡事皆決于

旺扎勒達實特穆爾僅署成案而已 是年淮安城陷  
廉訪使楮布哈死之楮布哈居羣盜間守淮安者五年  
大小數百戰糧盡食草木螺蛤魚蛙烏燕及靴皮鞍韉  
革廂弓之筋俱盡撤屋為薪人皆露處城陷布哈猶據  
西門力鬪中傷見執為賊所嚮子巴噶亦死

十七年八月張士誠侵嘉興楊旺扎勒敗之士誠乃以  
書約降旺扎勒欲納之達實特穆爾以其反覆不可信不  
許旺扎勒固勸乃承制假江浙廉訪使周伯琦行省叅

政至平江招諭之士誠始要王爵不許又請為三公旺  
扎勒亦力為之請達實特穆爾幸其降遂授士誠太尉  
其弟士德淮南平章士信同知樞密院事其黨皆授官  
有差於是朝廷以招安士誠為達實特穆爾之功加太  
尉九月徐壽輝將陳友諒殺倪文俊併其軍自稱平  
章

十八年正月陳友諒破安慶淮南行省左丞余闕死之  
先是余闕固守安慶倚小孤山為藩蔽命義兵元帥胡

巴延統水軍戍守友諒自上流引軍直擣山下巴延與戰四日夜不勝奔還賊追薄城下闕遣兵扼之俄而饒寇攻西門友諒兵乘東門既登城闕揀死士奮擊敗之敵兵恚甚乃并軍樹柵起飛樓來攻闕分兵捍敵晝夜不得息至是池州趙普勝軍東門友諒軍西門饒兵軍南門闕徒步提戈為士卒先分遣部將督三門之兵自以孤軍血戰斬首無算而闕亦被十餘創日中城陷火起闕知不可為乃引刀自剄墮清池塘中死妻蔣氏及妾

伊伯耶律氏子德臣女安安甥福童亦皆赴井死同時死者守臣韓建一家被害居民誓不從賊焚死者以千計其知名者萬戶李宗可紀守仁陳斌金承宗經歷段桂芳都事特穆爾布哈千戶盧廷玉葛延齡邱蚤許元琰奏差烏德美百戶黃寅孫安慶推官黃圖魯岱經歷楊恒知事余中懷寧縣尹陳巨濟事聞贈闕平章政事追封幽國公諡忠宣 四月陳友諒破龍興時和尼齊以左丞守洪都舊帥多通任其將章巴延布哈雅克布

哈捍城頗有功和尼齊疾而撓之城陷和尼齊出走多  
通奔撫州謀舉兵為追者所殺友諒盡陷江西諸路  
十九年六月陳友諒遣其黨王奉國寇信州巴延布哈  
德濟自衢往援破走其兵時鎮南王子大聖努屯兵城  
中開門出迎巴延布哈登城四顧誓以破賊自許後數  
日賊又來攻遂分兵為三出城奮擊斬首數千級復大  
破之友諒弟友德植木柵攻城益急又遣使來說降巴  
延布哈德濟曰汝來誘我耶我頭可斷足不可移乃數



其罪而斬之由是日夜鏖戰糧竭矢盡而氣不衰城中  
食草苗茶紙括靴底掘鼠羅雀殺老弱以食已延布哈  
屢出兵破賊奉國遂穴地道晝夜攻之不息踰旬城遂  
陷已延布哈德濟與大聖努及部將哈喇丹蔡誠蔣廣  
皆戰死初已延布哈德濟之赴援也入白其母鮮于氏  
曰兒今不得事母矣母曰爾為忠臣吾亦何憾因命子  
額森布哈奉其母間道入閩以江東廉訪司印送行臺  
而提兵向信鮮于氏太常典簿樞之女 十二月陳友

諒徙其主徐壽輝都江州自稱漢王初徐壽輝聞友諒  
破龍興欲徙都之友諒忌其來不利於已不從至是壽  
輝引兵發漢陽南下江州友諒陽出迎而伏兵於城西  
俟壽輝既入門閉伏發盡殺其部曲惟存壽輝以江州為  
都居之遂自稱漢王立王府置官屬事權盡歸友諒壽  
輝惟擁虛位而已

二十年五月陳友諒弑其主徐壽輝先是友諒率舟師  
犯太平挾壽輝以行太平既陷急謀僭竊乃於采石舟

中佯使人詣壽輝前白事令壯士持鐵撾自後擊之碎其首壽輝死友諒遂於采石五通廟為行殿稱皇帝國號漢改元大義仍以鄒普勝為太師張必先為丞相羣下立江岸草次行禮值天雨至略無儀節

二十三年九月張士誠自稱吳王士誠雖降而城池甲兵錢穀皆自據如故又素忌楊旺扎勒欲圖之而達實特穆爾亦厭旺扎勒驕肆不可制乃陰與定計舉兵圍之旺扎勒及其弟巴延皆自殺士誠遂遣兵據杭城朝

廷因以其弟士信為江浙行省平章事方面大權悉歸  
張氏達實特穆爾徒擁虛名而已至是士誠乃令其部  
屬自頌功德求王爵朝廷未許士誠遂自立為吳王即  
平江治宮室官屬達實特穆爾飲藥死是年陳友諒  
與明兵戰敗中流矢死國亡士誠二十七年始滅方國  
珍亦降于明

諸帥之爭

博囉  
李思齊

庫庫  
張良弼

順帝至正十九年三月詔博囉特穆爾移鎮大同博囉

特穆爾者達實巴圖爾之子也從父討劉福通等屢立戰功父沒命為河南行省平章政事代總其衆擊福通於衛輝走之遂屯真定復自武安由彭城邀截沙劉等敗之引兵攻拔曹州至是朝廷命博囉特穆爾移鎮大田以為京師捍蔽復置大都督兵農司分十道專督屯田以博囉特穆爾領之

二十年八月詔博囉特穆爾守石嶺關以北察罕特穆爾守石嶺關以南初山西晉冀之地皆察罕特穆爾所

平定而博囉特穆爾兵駐大同欲併據晉冀遂相讐隙故有是詔九月博囉特穆爾復調兵自石嶺關直抵晉冀圍其城三日退屯交城察罕特穆爾發兵拒之朝廷遣使諭令講和未幾復命以晉冀畀博囉特穆爾察罕特穆爾不從遣部將筭卓等來爭交戰于東勝州等處朝廷為再遣使諭解二人始各還鎮

二十一年冬十月博囉特穆爾復進屯真定時察罕特穆爾被害子庫庫特穆爾代其任博囉特穆爾結張良

弼欲復圖晉冀引兵侵庫庫特穆爾分地遂據真定路  
二十二年六月博囉特穆爾遣珠展襲據陝西時陝西  
行省右丞達實特穆爾與行台有隙恐陝西為庫庫所  
有陰結博囉請珠展入城劫御史大夫旺扎勒特穆爾  
印復拘留之庫庫遣部將摩該合李思齊兵攻之珠占  
遂降

二十三年十二月御史大夫婁達實罷安置東勝州婁  
達實逃匿博囉軍中時帝在位久皇太子春秋日盛軍

國之事皆其所臨決皇后哥氏乃謀內禪太子而使宦者色布哈喻意於丞相太平太平不答遂罷去吹斯絅為丞相帝益厭政布哈乘間用事與吹斯絅相表裏四方警報皆抑不聞中外憂憤宣政院事托歡與之同惡為國大蠹於是監察御史也先特穆爾孟額森布哈傅公讓等乃劾奏色布哈托歡奸邪當屏黜御史大夫婁達實以其事聞皇太子執不下而皇后庇之尤固御史皆坐左遷治書侍御史陳祖仁連上皇太子書切諫之而臺臣大小皆辭職皇太子乃為言



于帝令二人姑辭退而祖仁言猶不已又上帝書言二人亂階禍本今不爰除後必不利侍御史李國鳳亦上書爭之由是帝大怒國鳳祖仁等亦皆左遷時婁達實執其事頗力皇太子因惡之而皇后又譖之於內帝以婁達實母舅故封為雍王遣歸國已而復以色布哈為宗政院使婁達實至大同遂留博囉特穆爾軍中皇太子屢索之不遣

二十四年三月詔削博囉特穆爾官爵時皇太子方倚庫庫特穆爾為外援而怨博囉特穆爾匿婁達實不遣

吹斯綱包布哈遂誣博囉特穆爾與婁達實等謀不軌  
詔削其官使解兵柄歸四川博囉拒命不受 夏四月  
詔庫庫特穆爾討博囉博囉知詔命調遣皆吹斯綱所  
為遂令托卜堅持穆爾舉兵向闕托卜堅兵入居庸關  
知院伊蘇詹事布埒齊迎戰不利皇太子率侍衛兵出  
光熙門東走古北口趨興松托卜堅兵至清河列營時  
京師無備城中大震令百官吏卒分守京城使達勒達  
國師至其軍問故托卜堅以必得吹斯綱包布哈為對

詔慰解之不聽乃執吹斯綱包布哈二人畀之遂復博囉官  
爵總兵事托卜堅率兵自建德門入覲帝于延春閣慟  
哭請罪帝宴賚之加博囉太保仍守禦大同托卜堅為  
中書平章政事 五月皇太子出奔至魯爾嶺詔追及  
之令還宮皇太子恚怒不已遂命庫庫特穆爾調兵分  
道以討博囉其東道以白筭卓領兵三萬守禦京師中  
道以摩該珠展領兵四萬西道以闊保領兵五萬合擊  
之闊保等進逼大同博囉留兵守大同而自率兵與托

卜堅婁達實復大舉向闕 六月白筭卓以兵至京師

秋七月博囉前鋒入居庸闕皇太子親率兵禦于清河  
軍士皆無鬪志太子馳還都城白筭卓引兵入平則門  
遂扈從太子由雄霸河間取道走冀寧博囉進軍駐健  
德門外與托卜堅婁達實入見帝博囉欲追襲皇太子  
婁達實止之帝以博囉為中書左丞相尋進右丞相節  
制天下軍馬婁達實為平章政事托卜堅特穆爾為御  
史大夫

二十五年三月皇太子下令庫庫特穆爾軍中討博囉  
特穆爾博囉聞之遂出二皇后奇氏幽於諸色總管府頃之  
逼后還宮取印章偽為后書召太子復逼后出而幽之  
遣托卜堅特穆爾率衆攻上都之附太子者調伊蘇南  
禦庫庫特穆爾兵伊蘇次良鄉不進謀之于衆皆以博  
囉悖逆中外同憤遂勒兵歸永平遣人西連庫庫特穆  
爾東連遼陽諸王共討博囉軍聲大振博囉患之遣驍  
將姚巴延布哈出拒至通州河溢營虹橋以待伊蘇出

其不意襲破之擒斬姚巴延博囉大怒自將出通州三日大雨而還時右亦數納美女於博囉至百日始還宮秋七月博囉特穆爾伏誅博囉先嘗以疑殺其將保安既又失姚巴延鬱鬱不樂乃日與婁達實等飲宴荒淫無度又酗酒殺人喜怒不測威順王之子華善忿其無君數言于帝受密旨與徐士本謀結勇士上都曼濟諾海拜達勒等陰圖刺殺之至是托卜堅特穆爾遣使上告征上都之捷博囉入奏行至延春閣下拜達勒自

衆中奮出斫之中其腦死妻達實超出擁博囉家屬北遁詔盡殺其部黨托卜堅引輕兵走巴爾斯之地朝廷遣使玉博囉首往冀寧召太子還京師 九月庫庫特穆爾扈從太子至京師詔以庫庫為中書左丞相知樞密院事太子之奔太原也欲用唐肅宗故事自立庫庫特穆爾與布呼齊等不從及還京師皇后奇氏傳旨令庫庫特穆爾以重兵擁太子入城欲脅帝禪之位庫庫特穆爾知其意比至京師三十里即散遣其軍由是皇

太子心銜之 十月樞密副使觀音努獲婁達實誅之  
托卜堅特穆爾尋亦被誅 閏月封庫庫特穆爾為河  
南王還視師是時中原無事而江淮川蜀皆已陷沒皇  
太子屢請躬出督師征討帝難之乃詔封庫庫河南王  
代之親征總制闕陝晉冀山東諸道并迤南一應軍馬  
便宜行事庫庫特穆爾於是分省自隨官屬之盛等於  
朝廷

二十六年二月庫庫特穆爾移軍懷慶未幾又移彰德



調度各處軍馬

二十七年李思齊張良弼圖嚕卜自會于含元殿推李思齊為盟主同拒庫庫特穆爾初李思齊與察罕特穆爾同起義師齒位相等夷及是庫庫特穆爾代總其兵思齊心不能平而張良弼首拒命孔興圖嚕卜等亦皆以功自恃各請別為一軍不相屬庫庫特穆爾遣闕保珪林齊以兵西攻良弼于鹿臺而思齊遂與良弼合兵連不能解庫庫特穆爾始受命南征反退居彰德惟思

用兵陝西由是朝廷始疑其有異志 秋七月詔皇太

子總制天下軍馬詔略曰曩者障塞決河本以拯民昏

墊豈期妖盜橫造訛言簞鼓愚頑塗炭郡邑殆遍海內

茲逾一紀故察罕特穆爾仗義興師獻功敵愾汎掃汗

洛克平清濟其子庫庫特穆爾克繼先志用成駿功皇

太子阿裕爾實哩達喇計安宗社屢請出師朕以國本至

重遂授庫庫特穆爾總戎重寄俾代其行李思齊張良

弼等各懷異見搆兵不已以致盜賊愈熾深遺朕憂詢

諸衆謀咸謂皇太子宜遵舊典總帥天下兵馬其庫庫特穆爾自潼關以東肅清江淮李思齊自鳳翔以西與侯布延達實進取川蜀少保圖噶及張良弼孔興圖噶卜共取襄樊詔書到日悉宜洗心滌慮共濟時艱朝廷屢促庫庫特穆爾出師江淮庫庫僅遣其弟托音特穆爾及摩該往山東而與張良弼構兵不已詔下和講之庫庫戕殺使臣跋扈之迹漸張朝廷疑之故有是詔冬十月詔罷庫庫特穆爾兵柄初詔書雖下皇太子亦


竟止而不行而分兵之命庫庫特穆爾終捍拒不肯受  
於是摩該闕保等皆叛庫庫特穆爾闕保自察罕特穆  
爾起兵以來即為將勇冠諸軍功最高而摩該善論兵  
尤為察罕特穆爾所信任及是兩人見庫庫特穆爾有  
不臣之心故皆叛之列其罪狀聞于朝舉兵共攻之而  
皇太子用實喇達哩塔喇實克巴延特穆爾李國鳳等  
計立撫軍院總制天下軍馬專備庫庫特穆爾以摩該能  
倡大義賜號忠義功臣落庫庫特穆爾太傅中書左丞

相依前河南王以汝州為食邑與弟托音特穆爾同居  
河南府從行官屬悉令還朝諸軍在帳前者白筭卓珪  
林齊領之在河南者李克彝領之在山東者伊蘇領之  
在山西者實喇達哩領之在河北者摩該領之庫庫特  
穆爾既聞詔即退軍還澤州詔又命圖魯與李思齊張  
良弼孔興圖魯卜率兵東向以正天討明年朝廷命左  
丞孫景逸分省太原關保以兵為之守庫庫特穆爾即  
遣兵據太原盡殺朝廷所置官皇太子乃命魏賽音布

哈及闕保皆以兵與思齊良弼諸軍夾攻澤州又下詔  
削奪庫庫特穆爾爵邑令諸軍共誅之庫庫特穆爾乃  
退守平陽而闕保遂據澤潞二州以與摩該合時李思  
齊張良弼孔興圖嚕卜等與庫庫特穆爾相持既久明  
兵時已及河南思齊等乃遣使詣庫庫特穆爾告以出  
師非本心遂解兵大掠西歸獨摩該復攻平陽當是時  
庫庫特穆爾氣稍沮而闕保摩該勢甚振數請戰庫庫  
特穆爾不應或師出即復退一日諜知摩該分軍掠祁

縣即夜出師薄其營擊之大敗其衆摩該關保皆就擒  
朝廷聞之遽罷撫軍院而塔喇實克巴延特穆爾李國  
鳳等以誤國皆受誅既而庫庫特穆爾上疏自陳其情  
朝廷復下詔滌其前非時聞明兵已定山東及河洛中  
原俱不守帝乃下詔復命庫庫特穆爾仍前河南王中  
書左丞相以兵南下伊蘇兵趨山東圖嚕出潼關李思  
齊出七盤金商圖復汴洛未幾伊蘇兵潰思齊兵亦未  
嘗出庫庫特穆爾又自平陽退守太原不敢復南向事

已不可為矣已而明兵迫京師帝北奔國遂以亡及明  
兵至太原庫庫特穆爾即棄城遁領其餘軍西奔于甘  
肅後不知所終





元史紀事本末卷四